

敬惜字紙銘

文帝教人，敬惜字紙。陰鷲文中，力闡厥美。自古名賢，識者凡幾？食報縈身，實膺福祉。桂籍一書，彰彰可紀。乃有愚夫，任其拋棄。或拭灰塵，或包餅餌；或糊窗櫺，或置床第；甚至穢污，殘踏踐履。疾病災殃，其應甚邇！余本書生，投筆而起，雖云荒經，時還讀史，從仕卅年，謬膺重寄。敬字築爐，隨處悉備。茲任九龍，倍深克己；地逼夷樓，如履虎尾。篤敬可行，聞諸夫子。單騎赴盟，艱險不避，六載從公，冰淵自矢。戎政餘閑，偶遊村里。見字多遺，行行欲止，拾歸焚之，願稍慰矣。惟是四方，街衢巷市，檢拾需人，必求專理，披閱輿圖，有地尺咫。築鋪捐廉，義學鄰比，龍泰為名，賃租積累；檢字雇工，費出於此。督造雙爐，在寨城裏。外建一亭，重廊迴倚，石柱雕簷，匠工豈侈？工人攜籃，往來迤邐，土掩沙藏，業殘破毀。檢拾勿遺，預惜寸晷。浣之香湯，晒之淨几，付之靈煙，歸之海涘。工如怠乎，吾則更爾。亭爐已成，私心竊喜，嵌壁大書，揮之以指。惜字有銘，莫嗔鄙俚。伏望群公，體僕斯旨，久而行之，功德無已。

咸豐九年(1859)歲次己未仲秋 署大鵬協副將張玉堂指書